



Komunikadu Imprensa
Tribunál Distritál Dili
21 Marsu 2016

**Tribunál Distritál Baucau no Dili kontinua kondena krime ho natureza
violénsia seksuál ho pena prizaun**

Iha Marsu 2016, Tribunál Distritál Baucau no Dili, julga no kondena krime ho natureza violasaun seksuál sira ho pena prizaun.

Iha 09 Marsu 2016, Tribunál Distritál Baucau kondena arguidu ZdS ho pena prizaun tinan 14 tanba arguidu provadu prátika krime abuzu seksuál ho agravasaun hasoru lezada ne'ebé sei ho idade tinan 11. Tuir relatóriu médiku ne'ebé junta iha autus hosi ospital haktuir katak lezada sofre kanek iha nia orgaun seksuál. Kazu ne'e akontese iha 19 Jullu 2011 iha Distritu Baucau no kazu ne'e rejista iha tribunál ho número prosesu: 0328/12.PDBAU.

Antes ne'e iha 04 Marsu 2016, Tribunál Distritál Dili kondena arguidu CdCF ho pena prizaun tinan 3 fulan 6 tanba arguidu provadu komete krime aktu seksuál ho adolexente hasoru lezada ne'ebé tinan 14 fulan 6. Kazu ne'e akontese iha 29 Agostu 2015, iha Distritu Dili no rejista iha tribunál ho número prosesu: 0106/15.PNSIC.

“JSMP rejista katak krime sira ho natureza violasaun seksuál kontinua konklui ho pena prizaun. Espera katak ho kondensaun ne'e bele produz efektu disuasivu ba autór krime ne'e no ema seluk atu hadok aan hosi krime ne'e tanba violénsia seksuál nu'udar forma ida hosi violénsia ba-jéneru no violasaun ba fetu ninia direitus umanus fetu nian,”dehan Diretór Ezekutivu JSMP, Luis de Oliveira Sampaio.

Estudu hatudu katak número fetu no labarik-fetu barak mak esperiénsia ba violénsia bazeiaba-jeneru, inklui violasaun seksuál iha sira nia moris lora-lora.^{*†} Tuir relatóriu JSMP kona-ba 'Akuzasaun, Julgamentu, no Sentensa iha Kazu Violaasaun Seksuál iha Timor-Leste, 2012-2015', konsidera katak violasaun seksuál nu'udar asuntu krítiku ba fetu no fetu-ran sira iha

* Relatóriu temátiku kona-ba [Akuzasaun, Julgamentu no Sentensa iha Kazu Violaasaun Seksuál iha Timor Leste-2012-2015-Marsu-2016](#) iha www.jsmp.tl iha parte publikasaun.

Timor-Leste. Estudu sira seluk hatudu katak feto no feto-ran sira barak mak hasoru violénsia bazeia ba jéneru, inklui violasaun seksuál, iha sira nia moris lor-loron.

JSMP enkoraja tribunál sira atu konsidera violasaun seksuál hasoru feto no labarik nu'udar krime ne'ebé grave teb-tebes no kauza sofrémentu psikolojiku no dezvoltamentu labarik sira nian ba tempu naruk. Tanba ne'e husu ba tribunál nafatin aplika pena ne'ebé refleta duni arguidu sira nia hahalok no aplika pena todan liu ne'ebé disponivel iha lei penal ba krime violénsia seksuál.

Relasiona ho krime violénsia seksuál ne'ebé buras iha Timor-Leste, JSMP ezije ba Governu Timor-Leste hodi asegura rekursu adekua ba área importante ne'e. Timor-Leste iha obrigasaun tuir lei internasionál CEDAW, Konstituisaun Timor-Leste no lei nasional hodi fo protesau efetivu ba feto kontra violénsia bazeia ba-jéneru no repeitu sira nia integridade no dignidade. Ida ne'e interese ba sosiedade enjerál.

Atu hetan informasaun liutan favor kontaktu direktamente:

Luis de Oliveira Sampaio
Diretór Ezekutivu JSMP
E-mail: luis@jsmp.minihub.org